

Բուն վանքն ընկնում է բակի հյուսիսային կողմը, իսկ արևմուտքից և հարավից միաբանների խցերն ենին. հարավային դարբասի մոտ, աղբյուրի վերա, շինված է մի փոքրիկ մատուռ: Տարաբաղդաբար փշացրել ենք մեր լուսանկարը և հնարավորություն չունինք վանքի ընդհանուր տեսարանի մասին գաղափար տալ*:

Պարսպից դուրս՝ հյուսիս—արևմտյան անկյունում՝ գերեզմանատունն է, հասարակ և փոքր խաչքարերով. դոցանից հնագույնը 1296 թիվն է կրում:

Ես Յակոբ մեղ... [աւոր] / քահ. կանգնեցի զխաչս ի / [փրկութիւն] . . . (յերկու տող չի կարդացվում) / աղաւթս... (մի բառ) թվ. 206. v: Մի ուրիշ խաչքար ունի «ի թվ. 206» թվականը առանց արձանագրության: Վանքի արևելա—հյուսիսային կողմը, պարսպից դուրս, բլրի վրա կա պատվանդանով մի խաչքար. ճակատի արձանագրությունը չի կարդացվում, բայց թևերի մոտ գրված է «206» թվականը:

Գյուղի մեջն է Ս. Գրիգորի յեկեղեցին, վոր հիշատակված է № 1500/1511 Հայսմափութի հիշատակարանում (Հավել. Բ. 13)՝ «Գեղամիջի սբ Գրիգոր» անունով 1471 թվին, բայց նորոգված է 1669 թվին հետևյալ արձանագրության համաձայն.

Մեք Կուզվայ ժողով/ուրդս շնորհօքն Գսի / շինեցաք սբ Գրիգոր եկղս հայրապետութի: տն Յակոբայ. թվ. ոճժը.

Պոռչանց նշանավոր կեդրոններից մեկն է Ածոփա կամ Ոծոփի վանքն էր, բուն Շահապունիքից դուրս, իսկապես Ճահուկի մեջ, Բագամվի վտակի վերա, վոր Ճահուկի արևելյան ճյուղն է. բայց տեսանք, թե ինչպես 1292 թվի մի հիշատակարան Ոծոպի վանքը Շահապունյաց գավառի մաս է համարում և Պոռչանց կեդրոններից մեկը, ուրեմն Շահապունիքն ու Ճահուկը մի գավառ հասկանալով: Վանքը շինված է գյուղի արևելյան կողմը, բերդի հանդեպ, մի բլրի լանջին, արեգակի և անձրևի աղեղնություն շուտ յենթարկվող սպիտակ քարից (պատկ. 17): Դավրիժեցին** Ածոփն անվանում է «շինյալ ի վաղեմի ժամանակաց վանք», բայց արձանագրությունները համեմատաբար նոր են, ինչպես և շենքը, ԺԶ. դարու գործ: Դավրիժեցին այս հանգամանքներին անձանոթ լինել չէր կարող, քանի վոր Վրդանես յեպիսկոպոս Ոծոպեցու ավանդությունը նա քաղել է Շահապունյաց ձորում և մերձակա վանքերում, բայց յեթե «շինեալ ի վաղեմի ժամանակաց վանք» է անվանում, ճարտարապետական հնությունը ի նկատի չունի, այլ վանքի հաստատությունը: Հնություն շատ հետքեր մնացել յեն և ներկա շենքի վրա. բազմաթիվ քարեր, նույն իսկ քանդակներով և արձանագրություններով, հին վանքի մնացորդներից, գոր-

ծաղրվել են նոր շենքի մեջ: Պոռչանց անվան անմիջական յիշատակությունը արձանագրություններ չունինք այժմ վոչ այստեղ և վոչ գյուղի յեկեղեցում, բայց մի շարք պարոն կամ բեկ տիտղոսներով նվիրատուների կամ հանգուցյալների հիշատակությունը հիմք է տալիս մեզ հավանական յենթադրություն անելու, թե նոքա Պոռչան ծագում ունին, քանի վոր Մարտիրոս և Ածոփ գյուղերը նույն տոհմի անմիջական տիրապետության վայրեր ենին:

Վասակ Խաղբակյանի Արատեսում թողած արձագրության մեջ, ինչպես տեսանք, նոր իշխանության սահմաններն ենին «ի Գառնոյ ի Բարգուշատ». Գառնոյում կամ Կոտայքում Պոռչանց հայտնի կեդրոնը յեղել է Այրի կամ Գեղարդա վանքը. բայց այդ վանքը յուր սահմաններով Վասակ Խաղբակյանի իշխանության մեջ չէր մտնում, այլ գնված է հետոյ՝ նորա վորդու Պոռ մեծ իշխանի ձեռքով, նույն վանքում թողած մեծ արձանագրության համեմատ. «գանձագին արարի ի տերանց աշխարհիս (Իվանեի կամ Ավագի տան) սուրբ ուխտս Այրիվանից լերամբ եւ դաշտաւ եւ ամենայն կազմութեամբ»: Յեւ հերավի Իվանե աթաբեգը յուր արձանագրության մեջ նույն վանքում հայտնում է, թե «տեսի զեկեղեցիքս եւ զսրբս եւ ինձ անոշ թուեցաւ, յիմ անուն արարի, զիմ յիշատակս ի վերայ գրեցի» (Հավել. Ա. 2): Այստեղից պարզ է, վոր Վասակի «ի Գառնոյ ի Բարգուշատ» խոսքերի մեջ Գեղարդի վանքը չէր ընկնում. մատենագրական տեղեկություններ ել չունինք մեր բանասիրության մեջ, թե Պոռչանք բացի Գեղարդից վոր և է կալված ունեցած լինին Գառնիում կամ Ազատ գետի հովտում: Այս պակասը լրացնում է Վասակի միտքը պարզում են արձանագրություններն ու շինարարական մնացորդները, վորոնք դեռ ևս հարկավոր ուշադրության չեն արժանացել և արդեն մոտ են քայքայման ու վերջնական կորստյան:

Ազատ գետը բաղկացած է յերկու մեծ վտակից. դոցանից առաջինը հոսում է Գեղարդա վանքի ձորով, իսկ յերկրորդ ավելի մեծ վտակը Գեղվա ձորով, վոր այժմ Միլլի չայ է կոչվում: Գեղարդա և Միլլի չայի մեջ ընկնում է մի լեռնագոտի, վոր յերկու վտակների խառնարանների մոտից հետզհետե լայնանում է և բարձրանում դեպի արևելք՝ Գեղարքունյաց բարձունքները. վորքան ահազնատեսիլ են, տեղ տեղ, գրեթե, ուղղահայաց կախված ձորի վերայ այդ սարի հյուսիսային կողմը, նույնչափ գեղատեսիլ և ակնապարար հարաւային կողմը, վոր աստիճանաբար իջնում են դեպի Միլլի չայը և մի սիրուն ձորագոգ կազմում: Սորա հյուսիսային լանջին է ընկած Աղջոց Ս. Ստեփանոսի վանքը (պատկ. 19), բաղկացած բուն տաճարից, գավթից, վորի հյուսիսային պատն է միայն մնացած, և Պողոս - Պետրոսի փոքրիկ յեկեղեցուց: Վանքը հիմնված է ըստ ավանդության Լուսավորչի ձեռքով,

* Տես. Սմբատեանի լուսանկարների ժողովածուն:

** Պատմ. Առաքել վարդապետի Դավրիժեցույ. Բ. տպ. Վաղարշապատ, 1896. յեր. 427: